


嘉興府志

十三四

七



			九	漢
		一〇七	〇	書
		三三九	七	門
一	一	三	九	類
六	三	三	九	
册	架	函	號	

庫文閣內			
元	九		漢
二	〇		
二	一	七	
一	一	七	
二	六	九	書
架	冊	號	類

內閣文庫	
番號	漢 9079
冊數	16 (7)
函號	292 67



嘉興府志第十三卷


淺草文庫

賜進士中憲大夫知嘉興府事安成劉應鈞重修

賜進士奉政大夫南刑部郎中郡人沈堯中編纂

賜進士朝列大夫南國子祭酒郡人馮夢禎叅攷

平湖縣學生員 朱朝俊 孫弘勛 校正



名宦 以下郡職

後晉

錢元弼崇德人晉天福三年始置秀州元弼為刺史經營新治以惠愛稱官終金吾上將軍

宋

王恕深州饒陽人後唐時童子及第開寶中知秀州盜起城陷殺恕其子濟方壯角賊刃脇之濟伏尸號慟指賊曰父死吾安用生恨不能殺汝報仇耳賊義釋之官軍至濟謁帥陳言賊計帥賜束帛聞于朝假驛以歸後以死事孤試學士院補官柳植字子春真州人進士歷著作郎直集賢院知秀州恭慎自持一介不取世傳其廉官終吏部侍郎

劉師道字損之東明人進士景德時知秀州敏於吏事獄無停繫累官樞密院直學士

李餘慶字昌宗連江人判秀州境多鹽盜餘慶設華亭海鹽二監俾業鹽者歲入常緡以杜私販又為石隄自平望至吳江捍除水患

葛宮字公雅江陰人進士知秀州州有關涇瀆口婚塋趨期者為所難阻公命悉去之官終工部侍郎

錢藻字純老和州人進士大中祥符間判秀州善

持法擊奸仆疆郡中大治終翰林學士

葉清臣字道卿長洲人進士歷集賢校理知秀州

有敏才見可輒為入判三司戶部勾院終侍讀學

士

羅拯字道濟祥符人進士歷知秀州為人長厚以

愛利為行吏民推戴歷天章閣待制

聶厚載皇祐中知秀州剔姦弊蘇窮困郡中安靖

以循良聞

孫洙字巨卿廣陵人進士補秀州法曹初至人以

書生易之洙政理精練素宦無以過之以艱去吏

民見思

錢顛字道安無錫人治平末為殿中侍御史熙寧

新法行顛極言其弊坐貶秀州遂卜居焉家貧母

老每貸親舊以給朝哺怡然自如

張先烏程人進士元豐中判秀州有俊才尤工于

詩曾建花月亭有雲破月來花弄影之句終都官

郎中

王覲如臯人進士為秀州司戶叅軍沉厚精敏有

文武長才士大夫多薦揚之哲宗即位擢右司諫
首陳知人安民之術累官御史中丞龍圖學士
沈括字存中錢塘人進士累官龍圖學士元祐初
謫知秀州博物怡聞政事開敏稱名守

韓瓘字德全開封人叅政億之曾孫元豐間知秀
州從劉安世遊學問精博蒞官敏銳事無壅滯吏
不敢欺皆稱有忠獻家法

毛滂字澤民江山人有文名蘇軾薦之政和間守
鄞因家焉

洪皓字光弼鄱陽人進士宣和中為秀州司錄大
水民饑以救荒自任發廩損市直揭旗市上無敢
貴糶不能自食者為煮粥食之立屋於東南兩廢
寺十人一室男女異處涅黑子識其手防其淆偽
會浙東緇米四萬斛過城下白守邀留以濟守不
可皓曰願以一身易十萬命竟留之廉訪使至悉
其狀具奏脫其罪且繼之粟前後所活九萬五千
餘人民感切骨號洪佛子其後秀軍縱掠過皓所
不忍犯使金留十五年執節不屈高宗比之蘓武

嘉興府志 卷之十三
累官端明殿學士謚文惠舉三子适遵邁士民建
三瑞堂祝之相繼登詞科名滿天下

樓异字試可奉化人宣和初知秀州以善理聞終
徽猷閣待制

宋昭年宣和間知秀州會睦賊方臘起陷郡縣昭
年繕城隍為備已而賊將方七佛引衆七萬來寇
昭年與統軍王子武乘城自固賊不敢薄及大軍
至乃出擊賊斬首九千朝廷嘉之進秩

劉寧止字無虞歸安人進士知秀州有文名臨事

慷慨官終吏部侍郎徽猷閣學士

程俱字志道歙縣人進士建炎初直秘閣歷知秀
州會車駕臨幸有旨賜對俱陳濟大業致中興之
策言極剴切上欣然納之及虜騎南渡據臨安帝
使管押錢幣航海至永嘉既朝見以病丐歸官終
徽猷閣待制

鄧根字深伯昭武人進士建炎初知崇德與討陳
通及徐明功遷知秀州

方滋字務德桐廬人紹興初守嘉興急吏寬民百

廢具起徙建州學以興教化士感其德

汪義端字克之黟縣人乾道己丑廷對第三人歷

知秀州有勢戶占田數千畝不輸賦義端責其輸

而以田歸之民

喬行簡字壽朋東陽人進士守嘉興沉幾練達政

有緇紀累官少師封魯國公謚文惠

丁銳會稽人秀州司戶在官著仁政活民書二卷

行世

韓彥質淳熙中守嘉興遇事精敏姦猾畏憚既政

成優游撫馭郡以無事

吳柔勝字勝之宣州人淳熙進士為伊洛持敬之

學丞相趙汝愚知其賢將寘之館閣乃權差嘉興

府教授柔勝日切磨諸生講學不怠浙右大水常

平使委以荒政竭力推行多所全活會汝愚去國

御史湯碩劾柔勝擅放田租為汝愚收拾人心且

主朱熹學罷之終知太平州加秘閣修撰

黃灝字商伯都昌人進士歷大府丞知秀州兼提

舉浙西常平州大饑海鹽尤甚有食其子持一臂

嘉興府志 卷之十三
行乞者朝旨停閣夏稅瀨乃更請秋苗不俟報行之言者罪其專仍削兩秩而後其請州人尸祝之姚憲字令則舜明之子以父任補海鹽丞惠利及人後監奏進院知秀州土豪錢安國舍匿亡命為奸盜州縣莫敢詰憲禽之并其支黨悉置於法焚其巢穴州里遂安浙西大水民饑憲請輸粟萬斛以賑朝廷賜書獎諭累官叅知政事

胡沂字周伯餘姚人進士紹興間秀州軍事推官沂務忠厚而不廢發摘郡賴以安改宣州教授終禮部尚書為名臣謚獻簡

徐蕺字子禮吳人進士初知江陰軍歷浙東提舉常平乾道末知秀州以文章飭吏事無苛猛之政吏民舉安

丘密字宗卿江陰人進士第三人乾道間知秀州時華亭捍海隄廢鹹潮壞田密訪其遺趾奏乞剏隄瀉鹵復為良田御史蕭之敏按視奏密所築合東西兩岸塘凡八十四里為蘓湖秀三州無彊之利詔增密秩累官同知樞密院事謚文定子壽邁

嘉興府志 卷之十三
司農卿家崇德保寧鄉

鄭伯英字景元永嘉人進士乾道間判秀州僑徒果決論事慷慨其志必欲盡洗紹聖以來弊政復祖宗之舊不苟祿仕尋以親老辭任著述自老岳珂彰德人嘉定間守嘉興有惠政痛其祖武穆為秦檜所陷政暇輒屏居治西北偏金陀坊著籲天辨誣天定錄諸書題曰金陀粹編

彭欽字仲恭清江人嘉定間以父廕授軍器監主簿或欲刪其父所編內治聖監欽持不可遂請外

添差嘉興通判監司表其廉平

孫夢觀字守叔慈谿人進士歷知嘉興府布衣疏食行節儉之化歷官吏部侍郎

王介字元吉平江人進士對策有直名歷宗正少卿中書舍人會不雨乞免丞相史彌遠出知嘉興府歲餘去民不忍舍終知慶元府謚忠簡

劉漢弼字正甫上虞人進士知嘉興府嚴義利政切時宜官終戶部侍郎謚曰忠

唐璘字伯玉古田人進士為監察御史劾奏丞相

嘉興府志 卷之十三
李鳴復不報遂七上疏丐外知嘉興在郡無幾政
通人和及去父老遮道出涕璘遜謝猶牽連江干
數十里不絕官終太常卿

趙與訾字中父憲靖王伯珪曾孫家歸安以父廕
歷監海鹽場浙右鹽茶司主管文字浙西提刑司
幹辦公事咸有政績淳祐末知嘉興府稱循史
謝瑩天台人寶祐間守郡興學勸士士民稱頌
趙景緯字德父於潛人進士咸淳初守郡其治護
根本正風俗史稱醇儒遷宗正少卿終禮部侍郎

謚文安

陳埴字和仲鄞縣人試省部皆第一為太常博士
娶史彌鞏女而不附彌遠出為郡守政因人情禮
賢下士熙然春融公庭虛閒日進衿佩與之問難
傍郡學士皆借廛來歸彌遠死召為樞密院編修
官民涕泣借寇不報終國子司業
陳肖孫奉化人咸淳初以善政事驟用繇大理丞
戶曹郎知嘉興府
皮龍榮字起霖醴泉人進士景定初參知政事知

嘉興府有智略精春秋學性抗直爲賈似道所擯徙衡州

陳著景定中著作卽上疏論賈似道害民出知嘉興府時徐經孫亦論似道致仕去經孫所舉陳茂廉時爲公田官分司嘉興曰我不可以負徐公亦致仕去時人稱爲三烈

元

和元昇字仲德東平人至元間爲守有寬厚廉平之稱

辛仲寶字仲和彰德人大德初守郡政事修明興利舉廢悉中民情沈天祐臨安人大德中路學教授尊經術制古樂復侵田有殊功焉

高睿河西人以恩蔭歷禮部侍郎除嘉興總管時盜晝掠民父捕不得睿下令生擒之累遷廉訪使杜浦府總管勸農桑除民疾苦尤務興學校教化大行浦後有劉貞拊循鰥寡愛民造士有浦之風去任民多垂涕

嘉興府志 卷之十三
程榮秀字孟敷休寧人延祐末路學教授新陸宣
公祠訂正遺書風厲學者擢浙江儒學副提舉
褚君實石樓人泰定中為嘉興路治中政事精明
奸猾屏息傍郡冤滯者多赴訴之後為淮東廉訪
副使守危城城陷死節世比之張巡追封衛國公
謚忠肅

鄭大忠字義甫其先契丹人祖父仕金為將南征
戰死因家於洛而大忠有才猷推擇為吏部主事
延祐末歷嘉興路推官以廉敏聞時郡訟紛壅囚

繫充斥大忠悉遣決之數月無事傍郡縣訟獄者
皆願從大忠決遣人以為神明云復召為吏部員
外郎

陳春至正中路推官時私鹽獄興繫千餘人不決
春一訊釋被誣數百人其時久旱至是雨號陳公
雨

方道叡字以愚淳安人進士授編修官至正中改
嘉興路推凡聽讞必解獄囚桎梏賜之飲食温辭
反覆務得其情民為之語曰方推一斷死而無怨

遷杭州判終江西行省員外郎

陳良弼字公輔寧國人至正間路學教授律身彰

教皆遵古道一錢斗粟不入私室修葺學宮經費

鉅萬以屬良弼良弼辭非儒官所預守益賢之

貢師道字道甫宣城人舉茂才累國史院編修會

修宋遼金史忤當事出為府治中上下憚其廉明

久不調尋卒

唐肅字處敬山陰人鄉舉調黃岡書院山長遷嘉

興學正文章號大家行尤修飭縉紳咸推重之出

其門者號有師承 明興用近臣薦擢編脩

皇明

呂文燧字仲明永康人元季起兵保鄉邑王師克

婺藉兵來歸 上以為廬州守洪武元年改守嘉


興松寇錢鶴皋來襲城文燧告急於行省李文忠

計擒之諸將欲屠城文燧爭曰據城者賊民則何

辜乃釋不屠尋詔文燧持節諭闍婆國道死已而

私鹽獄興有司以文燧嘗署牘奏籍其家 上知

其誠信不圖奸利且歿於使事特詔還之



嘉興府志 卷之十一
孫作字大雅江陰人任太平府學教授 上以其
博學能文特改嘉興府學教授

謝節字士毅洪武初知府時干戈甫定節與民休
息每芳辰騎從出遊使見太平氣象云

薛祥字彥祥無為州人洪武初為京都漕使 上
以蕭何寇恂比之遷工部尚書在 上前數直言
全活人輒以千計丞相李善長胡惟庸皆惡之左
遷北平布政使有惠愛惡祥者謂天旱寔祥有愿
政已未春謫守嘉興愛民節用稱為循良惟庸誅

召入見上曰奸臣每讒汝汝何不一言祥曰臣但
自省何敢訴人復以為工部尚書

何敏中廣信人以才行卓異舉為令上書言時政
上亦遣行人賜以酒醴洪武中守嘉興政聲茂著
龐安洪武中通判是時鹽禁殊嚴安獲鹽徒械送
京師而以鹽賞捕獲者戶部以安違例取罪狀安
上書曰律者萬世之常例者一時之旨今欲准例
而行則與給賞應捕之律相違而使陛下失大信
於天下也 上是其言詔如律是時太師李善長

等方賜死 上用法嚴群臣震恐而安獨奮身抗
言卒得所請世皆壯之

趙豫洪武末推官囚有絕餉者豫繼之就食或教
囚亾囚卒不忍

劉觀洪武末知府尊禮賢士修學政興利去害郡
中肅然永樂改元擢雲南按察司使未行拜戶部
侍郎

楊得安宜興人國子生永樂初知府政事和易與
物無競察案咸推服之擢僉都御史

齊政山陽人進士永樂中知府時徵役鑄錢民苦
妨農政乃分為三番使得更代迄役而民不知勞
劉燾字尚載太和人國子生永樂中自柳州移守
慈祥豈梯不任威刑郡人愛之尋移寧波歷守七
郡皆有惠政

劉縉字縉紳淮安人國子生宣德初同知副果有
為在郡九年以致仕歸

張恭忻州人宣德初經歷副直廉介不携家累將
一子栖止幕廳之後簏衣糲食如寒士陞知壽陽

嘉興府志 卷之十三
縣先是有尹道充者安福人任經歷亦有廉能之
譽

張魁字萬選新淦人宣德初府教授有經術嚴督
諸生以身為率諸生奮起科第視前為盛召為御
史

黃懋字子勉元氏人進士正統初知府剛方廉正
子惠困窮力除奸弊奏築捍海隄尤注意學校拔
呂文懿公原於諸生擇郡中秀茂假館授業又躬
校督之人材聿起郡人戴如父母陞福建左布政

使還卒嘉興今其墓在嘉邑之北板坊其子中浙
江中式

舒敬字守中靖安人進士歷守嘉興能燭吏民情
偽篤意教化營郡縣學課諸生以道術肄習四禮
燕語從容咨訪得失以忤鎮守中貴坐免

王應清江陵人國子生正統末嘉興同知性寬易
言動安詳持身清謹得上下心遷知池州

楊繼宗字承芳陽城人進士先後守郡凡九年民
愛之如父母 天子聞其名嘉禾生野滿去涕泣

挽留者萬餘人至於今俎豆日嚴士民為輯遺愛
錄傳之其異者繼宗最重學校有兩鄉儒者皆能
詩行修延為社學師置之上坐儒不敢居繼宗曰
吾子弟師也豈宜過讓必上坐之郡中自是知尊
師有張氏父子號四凶為民患繼宗下車召至庭
戒之不悛仍劫桐鄉庫絹收捕論死賄當路求脫
當路以無原告為解繼宗應聲曰請以朝廷為失
主楊某為原告當路語塞竟論死富民有患壻貧
告停婚者繼宗責富民輸二百金聽別擇壻既具

語之曰我以此付爾壻立家爾女得所矣令即日
成婚官舍止携一蒼頭圖書數卷衣篋一鎖鑰不
具有孔御史行郡輒箠楚殺人繼宗面數之不從
因揭示通衢曰孔御史杖殺人役赴府報名孔切
齒之直入郡舍視卧內蕭然旅次孔愧謝出境中
貴監織造誅求他郡縣金繼宗戒郡中無與中貴
憚繼宗盛治具以金甌行酒繼宗曰何太僭侈耶
我百姓貧不能支若費幸即發中貴不敢留居常
積粟三年得數百萬斛丁亥戊子大饑郡人賴是

嘉興府志 卷之十三 十六
全活移羨餘以振浙東其後郡復饑繼宗復發廩
不及閔白督儲督儲怒行郡按其事方展牘旋風
起揭牘空中鷹數十乘之爪去督儲駭異遂行繼
宗朝覲至京時中貴汪直橫甚公卿多出其門直
雅聞繼宗欲致一見竟謝絕之司禮張敏者浙鎮
守慶之兄繼宗嘗窘束慶敏為慶訴 上上曰此
非不要錢楊繼宗乎敏皇懼頓首繼宗生平慕包
拯為人對 上疏亦願學拯在郡時人多以包稱
擢浙江按察司使終僉都御史

楊冠字尚文欽州人國子生佐郡最久亦稱良吏
遷知平樂府

徐霖字用濟金谿人進士歷任嘉興府器宇風雅
政事敦龐成化二十三年夏旱公欲具題減賦中
有齟齬之者公再三申請卒得蠲免民永戴之
柳琰字邦用儀真人進士弘治初守郡廉慎淳確
政有調理卒於官士民惋惜之琰病劇僚友傷其
廉悉索琰在郡所積羨贖得銀若干兩請以歸之
妻孥亦以言琰曰吾豈以垂盡易所守哉言畢而

逝郡故無誌琰聘平湖教諭林光輯之光字緝熙東莞人舉人與陳獻章莊昺輩遊務心性之學動中規矩教人崇本茂實居九年遷國子博士終襄府長史

梁材字大用大城人進士正德初守郡精悍廉介布衣疏食善摘發奸伏左右莫敢近吏牘章程皆有限刻郡稱神明改知杭州官終戶部尚書

陳琳字玉柔莆田人進士為御史提督南畿學政忤逆瑾被謫正德初同知嘉興代材為守專務以

德化民請托不行延獎諸生興起道藝士民親愛尋遷山東提學副使終南京兵部侍郎

伍文定字時恭松滋人進士府同知時流賊猖獗文定練兵訓士為防禦計民以無恐後佐王守仁擒宸濠官終兵部尚書

李伸字道甫三原人進士為監察御史按江西能預防宸濠奸擢守嘉興以道自重言笑不苟對吏民不怒而威有大豪侵官錢事覺在繫奸利益甚伸廉得之令并收其子子聞膽破嘔綠汁死有殺

兄謀奪其官者不具輸狀伸一訊服於是奸惡束手無敢撓者每從學士弟子講學相詰難至忘等威及遇事不假毫髮舉措因民不干聲譽中和之政獨推伸焉伸去郡久士民頌思如一日

孟津字有涯信陽人進士正德中以御史左遷歷府同知蒞官清白不事矯飾文名重於時終南京大理卿

徐盈字子謙貴溪人正德末郡守宸濠之變武廟南征所過郡縣供億繁重吏緣為奸百姓驚

盈固料理然鎮靜不遽科率及回臺事竟寢視他郡獨晏然時常熟濬白茅港當事者檄發郡丁數萬盈持曰白茅水患於吾郡差緩驅吾民遠役何忍耶移文助費不就徵發巡鹽御史行郡鞭撻亭窳勒報鹽丁里胥乘機虐民民大擾盈爭之御史曰此有例盈曰例自公作亦自公止豈國憲耶獲止又加意學校士皆興行吏民守法風俗一變郡中語曰徐公祖步楊武楊謂繼宗也居六載以詭免郡人萬口稱寃時覲還過郡老幼遮道號泣立

石紀績題曰徐侯墮淚碑

蕭世賢桐城人嘉靖初知府端靜嚴飭禮賢好士
蓋身持介操而不釣時譽誠良大夫也

何址字德徵進賢人守郡方嚴不假人以嘖笑衣
無重彩食不蕪味賓席餽遺僅取成禮遇事侃侃
以忤權貴不期月去不色愠民不忍其去如徐守

盈云

王學孔字安福人進士性稟醇篤實意御民

嘉靖初守嘉興時旱蝗相仍齋戒少禱甘雨時應

歲復疫癘乃大洗犴狴又為發粟賑饑全活甚衆
聽訟未嘗妄撻一人有蒲鞭風至豪右有權力者
毫不假借更飭育材別館文學駸駸盛矣及遷湖
廣副使士民為肖像立碑焉

劉邦采安福人崇尚禮學從王陽明先生遊以舉
人嘉靖癸卯除貳嘉興清慎恪職待細民煦若慈
母然卒不可干以私尤嚴夜警弭盜禁奸發隱摘
伏地方賴之

趙瀛三原人進士政尚剛毅禁賭博逐娼妓疏濬

嘉興府志 卷之十一
城河以其土運之南湖建煙兩樓時田糧多則吏
胥緣而為奸乃分田地山蕩二則均節調停賦額
均平百世賴之又修郡志有小學史斷紺珠等書
劉慤萬安人字致卿甲辰進士嘉靖辛亥年任時
值夏旱公率僚屬齋祓徒跣拜禱赤日中月餘不
懈卒得澍雨歲大稔癸丑倭夷侵境公撫膺揮涕
率軍民晝夜防守每寇至洞啓四門入郊關男婦
多所全活且身自出城激勵三軍以致大捷時撫
按交集視師新置督察大臣供億百出公彈力承

事纖芥無擾於民有挾權凌之者公侃侃不屈惟
以禮自守隱忍以濟大事其經營平善崇祠四城
委曲調停故雖建大工而民不知費舊額瀕海歲
貢黃魚公以兵興特疏奏補卒得停免至於廉介
之守終始不渝寬大平易世稱家法云

張任嘉定人字希尹丁未進士歷吏部郎中謫除
本府同知蒞任時倭夷侵境軍費不貲公與郡守
劉公協心撫字民得安堵後擢去百姓號泣遮道
立碑志思歷官巡撫都御史

嘉興府志 卷之十一 十一
范鵬字翼卿四川人由舉人嘉靖二十五年除本
府同知歷任八年一意寬和宛如父母所署縣篆
在在有德以地遠拂袖告歸畧無芥蒂去後幾二
十載民至今思之

殷廷蘭廣東人嘉靖癸丑進士授嘉興理刑廉介
端嚴不可干以私每聽斷詳審精密未嘗輕出入
郡是以無冤獄會署平湖事倭夷卒至僅隔一水
時未有城公令民無走當為疑兵以却賊於是晝
則揚兵夜則列炬舟卒市人聲應若十萬師賊駭

遁百姓歡呼相賀公曰是幸也不可再亟申請為
城以守經畫措置盡出於公無何公以憂去尋卒
侯東萊掖縣人進士下車問民疾苦重學校每試
士先期召各令入闈試畢分校高下躬自裁奪所
取十不失一又倭寇甫平沿城增建敵樓以備不
虞官終刑部侍郎

蔡廷臣江西人嘉靖乙丑進士任府司理剛明有
執抗直不阿斷獄詳允爰書悉出其手吏胥莫敢
為奸時有豪右翫法必置諸理不少貸召為御史

轉浙江大叅分守嘉湖隨轉觀察使民受其惠最久云

文彭長洲縣人待詔徵明之子隆慶戊辰以歲貢司訓府學坦率和易瀟洒出塵草書宗逸少畫得家傳殘縑斷簡人爭寶之一時名公俱從之遊至今仰其高風云

李橡豐城人嘉靖壬戌進士隆慶壬申守郡初下車首重學校論文講道諄諄如家人父子加意窮獨撫摩獨至其他均賦平役省刑簡訟西澤清江

南築海塘至久不磨云蒞任四載調梧州守去士民思之為立德政碑於三塔寺東

蔡民望舉人隆慶庚午為郡同知謹愿篤實人稱長者及署嘉善刑清訟簡催科不擾甚得民心迄今思之

陳文炅江西人萬曆甲戌進士丙子歲任府司理寬平有度讞獄之暇每進諸生講論經義品隲科目不爽尺寸與縉紳交飲人以和人皆愛敬之陞南比部主事卒於官

黃希憲金谿人登嘉靖癸丑進士萬曆丁丑來知郡事以清白自盟置天鑒簿登記贖鍰毫不自私聽訟必情理相參有欺罔者以三尺按之不少貸又勤於課士躬親校藝時為諭俗文以諷戒小民一時民知向方水旱少禱屢有靈應人以為積誠所感

黃清掾吏也先任台州府倅有幹材萬曆初颶風大作海塘悉圯當事題請修築并薦清同嘉興府事專管海塘清有智略砌石有法又開裏河以運石鑄鐵獸以鎮潮亦一時能吏云

王以修達州人進士庚辰年來守嘉興慈祥愷悌平易近民為政先德化而後刑罰每遇詞訟片言立決人稱神明且清操皜然纖毫不染士民方倚為命以內艱去七邑父老攀轅卧轍至不得行真稱賢守云

方揚歙縣人嘉靖辛未進士以戶部郎謫同嘉興府事志行端方兢兢以古人自律時吏胥有父死欲火者公給棺以葬遂禁民焚屍荒歲疫興捐

俸施藥署篆嘉善時大田後弊竇甚多皆躬親覈
 刷豪右莫得肆其姦公餘與諸生講論經學時有
 餽遺者面斥之嘗語人曰善陽也而為善宜陰彼
 夫矜詡之士哆口而譚安所稱陰為善也此可以
 見公之心矣擢守杭郡尋卒囊無餘貲縉紳俱遠
 賻云入蘇軾即且散歸不索士有文
 耿慎動真定府人以鄉薦初為令尹丙曆己丑任
 嘉興府學教授倜儻侃直不較束修其者更調之
 陞藩府去諸士迄今思慕焉

嘉興府志第十四卷

賜進士中憲大夫知嘉興府事安成劉應鈞重修
 賜進士奉政大夫南刑部郎中郡人沈堯中編纂
 賜進士朝列大夫南國子祭酒郡人馮夢禎叅攷

崇德縣學生員徐勞永勳校正

名宦以下邑職

嘉興縣

南宋

沈演之字臺貞武康人幼穎絕元嘉中舉秀才為

嘉興府志 卷之十四
嘉興令召為司徒祭酒墓在郡城北二十里

宋

李陟字允昇內黃人進士歷殿中丞令嘉興果毅有吏才治尚愛利為人所思

周沆字子真益都人仁宗時進士知嘉興縣摧強扶弱謹嚴畫一趙元昊擾西陲丞相富弼舉沆通判鳳翔府去二十餘年民猶思之以為前後罕儷仕至戶部侍郎卒溫公司馬光誌其墓

蘇袞武功人皇祐間知嘉興文學吏治皆有聲稱

王存字正仲丹陽人年十二辭親就師五年始歸登進士第調嘉興主簿擢上虞令歷館閣校勘集賢校理史館檢討知太常禮院

高覲字會之宿州人進士熙寧中嘉興簿謙已愛民有循吏風孫奭劾薦之累官集賢院學士

黃度字文叔新昌人進士知嘉興縣性明敏裁決無滯官終禮部尚書

韓晉卿字伯修安丘人以五經中第歷嘉興簿治尚循良奏課第一

元

潘明之至大間嘉興尉許白雲謙友善謙

稱明之英資挺特德性剛明能傳朱呂之學明之

嘗聘謙教其縣人謙未赴明之亦遂解任

陳伯顏字大有睢州人至正間尹嘉興時兵興征

調繁苛伯顏勸率巨室寬假貧弱細大無擾而事

亦辦給禁暴戢奸邑賴以安民書德政于碑

石光著字仲明海陵人後伯顏為尹清潔有執持

興學勸士嚴緝猾豪細弱得所民為樹碑焉

皇明

謝天錫字純父吳縣人嘉興簿國初羽檄交馳

邑當孔道傳使所經科索繁重天錫優柔處之民

孚事集兵後田多荒蕪悉勉有力者墾之繫囚重

疫為湯藥餽粥以濟有殺人情真而未獲尸久繫

稱寃天錫廉得之囚具服民稱神明

魏誠河東人洪武初嘉興丞鎮撫新附之民興舉

學校以善政聞

徐本字復初江西人洪武中知嘉興縣每東作興

為勸農文出郊課之百姓以此益知重農

張進字公迪金壇人洪武末嘉興丞為政勤勵雅

好文學吏民愛之擢監察御史

蕭福閩中人洪武末以儒士授嘉興典史在公清

勤雖處卑職理劇務而讀書講學不輟擢監察御

史

趙緯字大經初浙江按察副使摘嘉興典史

吏部侍郎黃宗載以清戎行部至嘉興苦籍伍漏

匿軍民訟訐分委有司皆莫能理以屬緯緯綜覈

搜剔不旬月籍成宗載大異之檄諸縣視以為法

傅霖字良佐貴溪人宣德中嘉興丞督稅不苛稅

完又先他邑公餘與僚友倡和多傳其句其句有傳名陞知東

平州

蔡楫字汝濟沛縣人由人才擢監察御史洪武三

十一年出宰嘉興在職公勤長于撫字敦勸學校

獎拔善類永樂三年復任御史

張雲字從龍初拜臨邑令鋤強扶弱以艱去天順

間改令嘉興居六載清慎有為陞濮州知州轉大

同知府 陳璧太原衛人成化間進士令嘉興以績最陞御
史按山東辨明太保劉瑯寃獄風紀振揚歷南京
太僕卿貞方廉潔權豪斂手擢都御史以疾歸善
吟咏動慕古人常以先憂後樂為心云

洪範字邦正金谿人進士弘治末令嘉興有才略
初至三月如不事事者吏卒頗侮之不加笞箠太
守目為庸才及編差糧長太守語節推曰糧長邑
之重後洪令不任事君為代之推曰此令長事也

代之彼不堪姑諭之意因召與語範從容應曰某
非不能為但無事不欲擾耳今郡公既相責某當
為之還呼里書集庭中焚香約明日審糧長官與
里書有欺謾者明神殛之吏卒前悔慢者復笞之
杖而懸諸門復申令曰聞審此後多集人廢時日
致多嚇取人財今我每區只用里老二人敢有妄
舉里老為代役毋貸庭中肅然皆以實舉盡日而
畢上諸府守驚曰此重事頃日月乃辦何草草乃
爾範應曰知縣但為之盡日足矣範辭還守覆覈

里老皆曰自耳目所聞見審此後不擾而辦者獨此令耳守嘆曰賢哉令乎召至府與款語事事明徹吏治平易簡當皆如此吏畏民懷縣中無事其鋤強右弱廉靖寡欲大類繼宗楊守士民為之語曰洪令楊守承前啟後召為監察御史終提學副使

黃訓字學古歙縣人進士嘉靖九年令嘉興為政溫良不干聲譽愛民好士有去後之思遷兵部主事

黃獻可莆田人嘉靖壬辰進士甲午年令嘉興愛民好士諸事井井時儒學僻處西城風氣不萃科第寥落公擇治東興聖寺址力請當事徙置之自此文蔚起萬曆中晏鑿東垣建橋改水丁酉科無一中式是年冬邑令鄭振先折橋塞竇庚子科遂中八人一時稱盛云

盧榎崑山人嘉靖乙未進士丁酉年令嘉興加意學校闢館延名士顧藹為師群弟子聽訓之又以田地多則建議均平為豪右所阻未及果行至丁

嘉興府志 卷之十四 六
末年郡守趙瀛行之蓋盧為蒿矢云

張師載潛江人進士嘉靖三十年令嘉興政務寬
大又極鎮密會編里甲委曲調停使貧富適均尤
廉介自持至召去行囊蕭然終巡撫都察院
張烈文雲南籍巢縣人嘉靖癸丑進士令嘉興誠
懇謹愿遇事務為兢兢不苟言笑雖其明敏不足
而清慎始終一節陞南京戶部主事葦有文海流
奇等編

郭東高平人嘉靖丙辰進士令嘉興溫良慈愛凡

遇訐訟每為和解不事鞭朴催征尚寬恕亦無逋
負丁外艱去民不忍忘迄今有餘思焉

何源字仲深廣昌人進士嘉靖三十九年知嘉興
事立身廉介治尚嚴毅清出侵稅戒期使完然不
終入其罪會水灾力請蠲賦召去民思之不置
曹存句容人嘉靖壬戌以鄉薦掌教嘉興佃儻有
大節諸生初食廩舊有贈金悉却不受月課鎖門
如闈人稱為嚴師

陳延吳縣人隆慶中任嘉興縣學訓導溫良和易

未嘗有疾言遽色每見諸士循循善誘被其延接者如坐春風中陞桐鄉學諭嘉士負笈從遊不忍自外迄今有餘慕焉

鄒東魯兗州府人萬曆癸巳以貢途任嘉興縣丞職司國賦賦長歲有常饋纖毫又不受又捐俸賞蚤畢賦者清操自堅甚至鬻衣以供餽粥居官六年終始一轍陞魯府紀善貧不能行邑縉紳捐金助之時里人姚思仁巡按東土給扁旌其門

秀水縣

皇明

趙忠廬龍人貢士為御史宣德六年秀水初柝乃改忠知縣事勤敏才辨百務具興有聲于時忠之後有喻義餘干人進士寬簡無事事亦無廢吏民咸愛之

黃憲萍鄉人正統末知秀水善撫字決獄稱平基年告治尋部民兵征處賊陣歿邑人痛惜之

韓啓字景明嵯縣人正統中學士呂原薦啓宜為師範授秀水訓導造士有方陞德府紀善

李伯璵字君羨上海人舉人秀水教諭監司薦其文學陞淮府左長史集文翰類選行于世
郭珙字元圭閩縣人進士成化中知秀水練達吏事洞悉民隱暮夜有投金者亟捕之不獲暴其金于市人莫敢以私干


許瑛當塗人正德四年繇功曹任秀水簿潔已愛民士大夫為冰壺秋月歌以羨之官至令尹後七十年而有孫應溪可踵其芳軌焉

孫樂字夔卿福山人進士正德初知秀水卓犖有幹局庭中肅然召為監察御史

蘇息字從仁華亭人進士正德中知秀水弱冠甚機警蒞事鎮密抑強扶弱號為賢令召為監察御史

劉夢陽臨清人進士正德十一年知縣事廉靜不擾尤博學能文簿書有暇即披典籍時或歌詠于堂皇有鳴琴栽花之風擢戶部主事

趙章合州人嘉靖四年知縣事性剛敏執法不撓即世豪罹於法不少貸至如下戶羸弱者必委曲



嘉興府志 卷之十四
訊鞠毋輕出入焉又能敬禮賢士大夫興學造士
士論歸之

洪遇歷城人進士嘉靖二十三年知縣事愷悌有
才畧先是民覬輕役多析戶寄產遇令民自疏歸
并賦均而民不擾歲大饑自鬻者衆遇不待聞上
官亟發廩振之所全活無算後以艱去邑人謠云
洪遇再來天有眼某某不去地無皮此可見民思
慕之情矣

王應顯漳浦人進士嘉靖二十九年知秀水時值
倭亂備嘗艱苦慈祥愷悌真民之父母也

陳松青州人進士官御史時分宜柄國同臺有非
禮諂事者邀松偕行松大詈遂拂衣起分宜聞而
憾焉左遷秀水令刻意為民鋤強扶弱邑有柄臣
子弟奴隸橫甚松裁抑不少貸竟遷平涼二守去
張道字以中湖口人進士初令姚江著賢聲補令
秀水推誠愷悌其治獄不煩簿書敲朴徃徃置質
成家于膝前屬耳至深更不厭必得其裏里中繇
或應徵需後輒絮語慰勞之農氓孺婦以時入額

雖牽裙引案無愠容士民懷德終公任無敢撓法者滿三載召拜御史還家徒壁立無餘賞

張綸字宣甫汶上人性醇朴少以聖賢自期從吳
旺湖先生講學深悟畫前之旨著三極圖說及圖
書考丁卯以貢士來司訓日進諸生講道于尋樂
軒常布裘芒履飯首箱一室蕭然諸生饋遺必峻
卻之雖蔬果弗受已擢三河令轉通州守釐奸剔
弊不避權豪公車交章薦之擢戶部員外出入平
允卻羨金所至以廉稱

由禮門字中夫杞縣人進士隆慶六年知秀水器
宇俊偉資性明爽初下車值造冊躬自核實時有
議均里甲槩及士夫者公曰仕民有等况爾民子
孫後豈無登仕者乎優仕于今政以貽恩于爾民
之後此不均之均也及編審畢民帖然稱平公誠
直待物人莫敢欺賦無餘逋民有遺愛陞兵部主
政

王諷祁門人舉嘉靖丁酉應天鄉試第一嘉靖三
十八年司邑教銳意作人建文峰塔濬鯤浪池闢

除衢道又立君親師三扁揭曾思垂訓于明倫堂能詩文有石龍集

陳九德字懋夫鎮海人進士萬曆十一年知縣事樸茂澹泊抵任時蕭布蕭然絳袍不具與人恂恂誠篤喜進諸生譚稅每聽訟不加鞭朴詳審畢情上下敬信之監司守相及他郡邑有牘不解者輒移秀水會暑月兼試兩邑士積勞成疾竟不起檢橐中幾不能殮邑人為賻視以歸立碑龍淵以致思云

孫應溪郭興人萬曆九年以監生授主簿廉潔自好職鹽盜每子夜躬率民兵四出邏探民得高枕卧鹽止捕及格禁從者妄索有幹才事輒立辦聽訟無枉滯郡邑移牘下僚皆願就孫簿理歷官通判

郭如川字元至富順人進士萬曆十四年知縣事歲薦饑加意賑恤全活以萬計其治邑多尚清淨雅抱羸疾不耐煩劇惟以清謹師吏民豪猾舞文者亦頗衰止非大獄輒移鄉三老諭之息操勵冰

築問遺無所受請托不行陞儀部主事士民祝之
嘉善縣

皇明

鄭時字習之沂州人國子生初知玉田改嘉善縣
性坦易不尚威嚴經營新邑勞民動衆而下無怨
言九載乞休

聶如斌豐城人宣德末嘉善典史才能超卓且有
冰檠操按察司軒輓輩交賢之事涉難辦者輒屬
如斌無難不舉嘗職水利令民多築隄防為水旱

備潛載小舸察民勤惰勸懲之又以北鄉濇下田
不償種多苦賠賂如斌督民高其圩塍自是有收
比遭大水憲臣行縣檢災如斌從焉憲臣有諱災
語如斌乃自投田間水深沒頂憲臣愧之民得免
稅今歲時之祭感恩渥矣

楊懋永寧人宣德中魏塘巡檢比有醜徒劫掠懋
勒兵巡檄擒其渠魁由是盜不犯境臺府上其功
加主簿俸是時分嘉善縣令懋經營不逾年而公
寓學舍皆告成焉

李遜字時敏南豐人進士正統初知嘉善機警有吏才下不能欺然性寬易民有犯小過笞之未嘗褫衣九載將行民乞畱陞俸復任三載陞知廉州府

陳勗字勉之宜興人舉人正統中嘉善訓導問學弘博砥節樹範每旦必齋居課士夜輒躬巡學舍察諸生勤惰加勸懲焉秩滿拜監察御史沈律字應和崑山人舉人授訓導性坦夷能詩文善作起士類兩典福建河南試太學生李萼有母

妻喪貧不克葬律首助之其尚義類若此

曾思孔懷安人舉人天順中嘉善教諭喜與諸生講授又樂振其貧時稱為良師云

汪貴字良貴歙縣人進士成化中知嘉善廉潔捐介愛民如子歲汰無名之費數十萬錢倉庾學校多其構葺與諸生講授不廢寒暑然性抗直短於應對不為當道所獎又不便豪猾坐調行囊蕭然擁畱者數千人巡撫王公恕知其賢疏令復任今祀名宦

潘瑜龍溪人國子生弘治中嘉善丞性剛果疏刷
凋弊姦豪屏跡陞知長安

劉子厲字克溫安福人進士弘治中知嘉善廉敏
精密斷獄律比銖兩重輕皆自手決胥吏奉成案

而已政雖尚嚴中實慈惠操履清白不為勢惕三
載召為監察御史

藍郁字國馨鹽城人進士弘治中知嘉善操履清
白愛民好士尤以厚風俗祛民患為急聽訟不任

威刑輒以仁義感動民多悅服卒于官

王績字紹夫樂平人領鄉薦授嘉善訓導立規條
盡心啓迪諸生無敢不遵者時學宮圯壞不以煩

有司身為之勸捐俸首建學門尚義者皆資助之
復肖像貌製祭器學制大備擢知忠州

區越新會人進士正德元年知嘉善少遊白沙之
門性慈祥政簡靜得親民體平居無疾言遽色民

甚懷之擢戶部主事
李錫字天祐登豐人國子生正德三年任嘉善簿
性侃直有大節八年姚源盜起錫應選率民兵從

嘉善府志 卷之十四
征至開化遇盜拒戰斬賊首三顆力屈被擒殺于
安仁之花橋事聞贈本縣知縣廕子入監後知縣
張煥於按察分司右建尚節祠祀之嘉靖間知縣
徐榮併入名宦祠

郭田字汝耕長安人正德九年進士知嘉善性簡
直政令畫一堅持冰檠操人有饋遺輒峻拒每見
解銀指謂左右曰此阿堵物能亡身敗家爾等毋
為所汙時有生員朱愚上書陳其過即榜之縣門
引以自罪後歷陞布政司叅議致仕今猶頌其廉

明云

倪璣字公在咸寧人進士歷給事中正德中謫丞
嘉善立法更化嚴保甲毀淫祠置義塚及社學書
院修縣志甚著政績三載擢令任丘

王德明字宗周清苑人進士正德中知嘉善持法
平允吏不能欺公庭嚴肅兵農穀粟咸有成畫當
道文移或不便於民輒停罷猶加意學校禮貌諸
生遷戶部主事

于業字建公金壇人進士嘉靖二十六年知嘉善

嘉興府志 卷之十四
蒞事精敏即猾吏不能為奸遇歲稔曲為蠲貸邑
藉無殍修邑誌置學田旌節孝尤勤考課以振後
學三載召拜監察御史

陳道基字以忠晉江人進士嘉靖二十九年知嘉
善性簡易不立崖岸與人語煦煦惟恐傷之屏苛
剔繁御下以寬三年未嘗入一重辟囹圄幾空然
又謂巨奸不去善良之蠹也初下車悉籍里中惡
少嚴刑苛校重困辱之仍書名申明亭有犯必懲
是以刑寬而政不弛故事日輪里長一人供役繁

簡不均偶值多事所費不貲因酌一年公用之數
通融計派貯銀于庫細戶有逋負鬻妻孥以償者
輒為代補間有窮民困迫無聊入縣請借公用餘
銀以自活道基隨數給之民亦無一負者上下相
信懽如一家又擇士之有志者聯文會躬為校閱
梓其文以傳召去民泣陳亦泣至今邑中村農塾
婦皆知有陳侯而祠祀之

許鎡字國器石屏人嘉靖乙丑進士知嘉善蒞任
務崇節省訪民疾苦有耆老董申畱心世故洞悉

江南利弊盡均徭均平等數事鎡得而奇之上巡按龐公力請從其議龐即具奏立條鞭法著為令甲考績至京拜御史官終僉事

胡夷簡江西會昌人少受學于念庵羅先生由選貢主嘉善簿恂恂儒雅清操皦然常俸外秋毫無染擢令長樂官終僉事

周霖字濟甫安福人進士嘉靖四十二年知嘉善年少英敏剖決如流尤屬意學校常以餘閒進諸生譚菽又啓書院擇士有志者漸摩之厚給以廩

餼躬為品題吏畏民懷更知華亭俱以賢稱官至吏部侍郎

陳大韶字舜舉雲南嵩明人童時侍父謁選京師父沒萬里歸襯廬墓三年母喪廬墓如初有於菟衛垣伊尼入室之異辟為庠生事聞詔旌其門尋貢授訓導性淳篤言若不出口動以禮信自持稱為毋欺先生在任七年致仕

蔡煥福建同安人由選貢任崑山訓導領嘉靖癸卯應天鄉薦署本學教諭標致屹然操履廉靖嘗

嘉興府志 卷之十四
捐俸課士品藻尤精士匪公服莫敢燕見相見惟
譚經濟文藝士咸畏慕文學斌斌盛焉後以賢聞
召為都察院司務歷官臨安知府

何天啓字義占江西貴溪人嘉靖十一年進士由
諫垣謫丞遷令嘉善前此訟多停滯天啓至三日
一聽剖決無畱勾攝不遣吏卒民無騷擾值歲潦
力請蠲稅竟為當道所阻乃以鈎矢之入俾賦于
官由是益得廉譽

黃樞字翊卿江西南昌人已未進士令嘉善外嚴
內明精核案牘發奸摘伏凜然有摧折之威邑大
潦禾盡漂詣當道免冠頓首請帑金以償稅尤畱
神里甲後法稱平猾書斂手但疾愬前尹事迹涉
鈎索不滿人意云陞南京工部主事遷湖州知府
卒

史朝鉉字貫之晉江人隆慶戊辰進士吏治明察
蒞政時容止儼然胥吏屏息性方介士大夫莫敢
干以私特以門第自高意氣稍亢厲耳

金和字元節長洲人萬曆甲戌進士性嚴峻持政

績密吏莫敢欺監司下令築圩和每鄉擇巨姓有行者董其事民不擾而功集至今賴之遇士子右恬退左趨承一時奔競頗息但習文法鈎剔不遺一入爰書曾無幸門人或病其少容德云

趙世顯字仁甫候官人由鄉舉署訓導丰采凝峻綽有雅致齋居左圖右書手不停披書法得晉人風骨尤工于詩所著有武塘稿丁外艱去登癸未進士

海鹽縣

漢

蘇章字孺文平陵人舉賢良方正對策高第安帝時為武原令歲饑輒開倉廩活三百戶遷冀州刺史

三國吳

步騭字子山淮陰人建安間遊吳中與諸葛瑾嚴峻齊名孫權為討虜將軍召騭主記除海鹽長性寬雅能屈志成功名博研道藝訓齊風俗及權稱帝以騭為丞相

晉

鮑陋隆安中任海鹽令會稽賊孫恩攻縣陋禦之
恩走復遣子嗣之以兵一千為劉裕前鋒追恩裕
慮吳人不習戰命之後嗣之竟前戰死

齊

周顥字彥倫汝南人隱居鍾山之北應詔為海鹽
令孔稚珪著北山移文嘲之

陳

徐份東海郟人侍中陵之子少有父風九歲作夢

賦為海鹽令有治績

唐

劉長卿字文房河間人開元時進士至德中攝海
鹽令有詩名官終隨州刺史有隨州集行於世
王孚海鹽令泰始初天下叛亂會稽守孔顥及吳
郡守顧琛皆據郡叛孚慎於守職以兵從巴陵王
休若討琛琛欲泛海走會稽孚邀擊之不得渡遂
走其黨

李諤字士恢長慶中海鹽令察俗利病施措宜民

開縣西古涇三百剏長豐開二節宣水利民歌其
功時有丞李顏亦舉其職

宋

魯宗道字貫之亳州人進士咸平間海鹽令有藍
田港白塔灣水歲久堙塞宗道疏治之人蒙其利
號魯公浦後令伍祐亭其上名魯浦亭宗道官至
叅知政事貴戚權倖憚其方嚴號魚頭叅政清節
直道為時名臣卒謚剛簡

李惟幾字幾道河內人嘉祐間知海鹽歲薦饑致
上書請官錢貸民糴種子濬溝洫置閘堰民獲泰
稔志遺愛焉後乾道中李大卞為令修堰閘之利
民亦稱之

范世京字延祖吳人文正公孫進士熙寧間令海
鹽勸民孝友力田治聲冠浙右時新法行召至京
將用之以論不合還治民歡呼相迎尋以疾乞休
詔進秘書丞致仕

何執中字伯通龍泉人進士元祐初知海鹽政識
先務建鄉校擇子弟入學親為講說又作隄以捍

海置閘以瀦水邑人賴之滿去父老泣雷紀其十
異官至太宰累封清河郡公謚正獻


喬大臨政和間知海鹽時朱勔以花石恣橫發蒼
頭抵海鹽僧舍封識花石復筭楚僧僧訴于縣大
臨追逮蒼頭杖之勔誣劾臨罷去高郵秦觀書其
事

朱良字良伯海鹽尉建炎中車駕南幸金兵寇境
上良曰此臣子効死時也集射士奮殺金兵披靡
卒以衆寡不敵死之贈銀青官其子思至漢陽守

丁安義紹興間海鹽丞值歲旱蠲常稅而和糴如
故安義謂令曰歲饑常賦且不足不應和糴檄屢
至俱停閣不發邑賴以寬

蔣行簡字仲可永嘉人進士歷湖州市舶監紹興
中知海鹽有聲還朝獻所著樞言五十篇通判興
國軍知處州聞趙汝愚謫死遂感疾不起

丘來字少潛常熟人紹興中知海鹽治學宮築海
堤二十里民有夙逋檢縣歲得羨餘悉為代輸郡
有疑獄卒得平反監司累薦擢朝奉大夫



嘉興府志 卷之十四
徐光實字德充晉江人進士紹興間知海鹽清白
慈愛歲旦輒縱囚歸省吏恐亡去囚輒如期至無
敢脫者

劉銓字全之樂清人進士隆興中知海鹽大水害
稼被檄檢傷放秋苗數萬斛貧不能輸者請于朝
得停閣勸富人發廩以賑全活甚衆民無畔資貸
于郡給之學舍久廢徹圭租二百斛倡修之政務
循良飾以儒術不求赫赫之名稱循吏焉

李大卞軋道中為令縣境有常豐二閘歲久僅存
其一日就隳圯大卞重修復又置堰以通往來民
甚便之

李直養字無害廣陵人待制正民孫也正民嘗寓
家海鹽淳熙間直養為丞著名紹興初攝華亭部
使者以才薦改海鹽令初蒞縣遭大旱直養禱之
得兩百姓歌頌興修學校延教諭朱沆為師嚴督
章程誦絃相聞置鄉底堰八十餘所及常豐閘又
自藍田廟開浦一十八里至鮑郎場以便鹽運民
被其利

嘉興府志 卷之十四
朱寢炎字叔明吳人前海鹽尉良魯孫寶祐初寢
炎復尉海鹽為人倜儻有祖父風善持論又廉恕
決獄平郡帥多屬以事

皇明

龐暘博興人進士洪武末知海鹽祛刷吏弊民心
歸之永樂間應求賢舉遷工部郎中

上官庶南豐人舉人永樂中知海鹽公平和易與
民相安卒于官士民號痛焉

林榮字尚仁閩縣人舉人宣德間海鹽學諭以經

義德行為教諸生貧無束脩者輒謝絕之卒于官
幾無以歛繼榮有豐城王楚章閩人鄭理劇沐陽
孫芳皆增置科條廣學舍切磨諸生相守若一不
為異同學政大新誦絃之聲蚤夜不絕人材遂彬
彬矣

莫震字霆威吳江人進士景泰中知海鹽有威嚴
吏民敬畏之毋敢干以私

王端字宗正河間人正統中知海鹽廉平淳謹入
覲道卒縣人哀之

楊克敬字宗禮真定人成化中知海鹽吏民無敢肆其奸然執法太嚴奸者不能堪造誣克敬邑人千百輩聲其枉竟白

譚秀字聳秀龍泉人舉人成化中任縣令居官清謹興學校修邑志以勤能為巡視刑部侍郎彭韶所許令有司以羊酒勸獎之

王璽字仲信廬陵人進士弘治中知海鹽以文章飾吏事新縣治興廟學築海塘具有成績遷去民

卓記之

嵇綱字汝堅直隸安東人由舉人先知餘杭正德初改令海鹽案無畱事獄無宿囚吏畏其明民懷其惠擢知湖州

辛九齡字希章山西蔚州人正德中由舉人任縣令剛方自負不私一錢

張濂字景周直隸蘇州人正德末以進士至蒞政三年民歌之曰前堂無吏人後堂無優人堂下無犯人擢監察御史

夏浚字惟明江西玉山人由進士嘉靖九年任縣

令政事英敏學識精醇每朔望至宮墻必與諸生講授選雋茂者閱文闡明經義卓有道趣造就所至相繼發科作人之風迄今興想續修縣志文獻可徵

呂湯民河東人國子生正德中海鹽丞事母至孝民稱之卒于官歸無行資入五部中由舉人

陳暹字序進莆田人舉人海鹽教諭有儀範洞達義理翰墨嘗修縣志繼暹有晉江蕭韶字鳳儀誠篤君子無疾言遽色耻言利

鄭茂莆田人進士嘉靖三十二年知海鹽精敏超卓有應變之才倭寇擾境盡力守禦克完民社擢兵科給事中民思之立碑焉

王宗載字京山人嘉靖壬戌進士奉命來

尹海鹽既至問民疾苦省刑薄稅施舍已責貪審徭役親自檢括里胥不能為奸境內高阜時濬水利農不苦旱他如修理海塘禁捕私鹽清覈軍匠查革虛名兵餉靡不精心遠慮著為令式政暇進諸士子于庭橫經講藝多所成就士民有清淨寧

一之謹迄今思之不忘

草木風雨之不振也... 嘉興府志卷之十四... 二十一

2

